

鍾山縣志

卷之十四

列傳

昔湘東王於忠孝完全者川金管書之德行精粹者用銀管書之文章瞻逸者用斑管書之此可推美於鄉閭門標棹楔并可稱賢於邦國坊表旌綸若永叔官高稱吳松以前輩山公望重羨子尼爲正人此善善從長者也至於趙普不純張湛詐善雖瑕瑜互見亦里黨交稱附筆墨以表揚俾姓名以久遠衆好之必察未知焉得仁史暫闕文留待後儒論斷賢必責備須學至聖嚴明志列傳

潘耀源先生事畧

潘耀源世居石龍叢桂村賦性慷慨好周急有稱貸者不令署券但簿記之計負欠不下四百金及有疾自知不起盡焚其簿生平雖以勤儉起家里中一切善舉皆倡捐不遺餘力嘗捐貲修其村後迤西馬鞍山石路里許又嘗運貨到粵變賣多置官

板書籍藏於家以餉里中學子不時參閱時方服賈僅一子需理家務百城虛擁咸笑其迂厥後其孫曾之芹之藻之蓮斯沛斯濬斯涵皆以讀書名震殊俗人始歎其器識過人云

陶耀玉先生事畧

陶耀玉字楨臣家世富饒而自奉儉約常以奢侈戒其子孫然遇有義所當爲者輒揮霍無吝色嘗在由迴龍過羊頭之龍岐嶺頂建築涼亭一座名曰甘飲亭並置田數畝贍守亭者令烹茗以供行旅又擬建一亭於沙子冲路次土木材料業已購備因疾作中止易簣時猶諄諄遺囑踵成之古所謂富而好行其德者非耶子陶成陶明孫士瑾士琅俱清邑庠

董成修先生事畧

董成修字竹軒清廩生天姿卓越文氣蓬勃每試必列前茅孫學使登其文於試牘批語嘉許鄉試屢薦不售人咸惜之性復剛直有殺人欲以陷其族者白諸邑宰已

定讞矣適某令至盡翻前案與之抗言銜之拘其族人三名鍛鍊成獄因抑鬱以心疾終

潘毓瑾先生事畧

潘毓瑾字藍田幼聰穎童年遊泮意氣特達以其父靈川從戎累績得注名保舉教職委署雒容訓導適楊學使視學到柳奇其才器之以卓異薦部時年僅二十八也及部文到而身歿未克展其長才人咸惜之

董邦彥先生事畧

董邦彥字虎臣邑庠少孤事母曲盡孝養爲人天性純厚器度豁達見義勇爲不畏強禦民國初土匪如毛騷擾鄉里彥乃主張自衛力倡辦團籌款養練前後擒獲匪類二百餘迴龍一帶賴以安靖居恒以濟傾扶危戡亂救災爲職志林知事廷楨許爲地方保障鍾司令鎮藩譽爲南區長城民十沈鴻英駐賀亦深嘉其辦團得力委代攝鍾山縣篆借到任七日客軍入境去職未克抒其政策李廣數奇於斯可見

潘昭瑾先生事畧

潘昭瑾字崑山其父耀源富而好行其德艱於嗣四娶生崑山急好義卓有父風事繼母生母尤曲盡孝道平日待人以誠復樂施予遇有貸者艱於償輒焚其券素好勸善文刊有手訂救溺戒淫合編及達生編諸書并附刻神效各方在內送人病將革猶遺囑其子孫增刊廣送其熱誠慈善公益有如此者

潘之萃先生事畧

潘之萃字藝圃少貧販油爲業有粵商陳某在石龍開福盛油店重其誠篤邀與合夥未幾匪亂陳携資去時石龍設有保衛局局中人接有匪耗皆皇遽失措適藝圃到局聞其事爲言防禦之策語觸某紳大受詰責先是陳去時遺有制錢五百千交藝圃保存他人不及知也至是爲某紳言所激遂悉數捐出養練某及在局人見之無不警愧亦相率破囊不數日歛集練成而匪至當匪之至也羣以藝圃爲首捐人請督陣願受指揮而藝圃亦迫於義不獲辭慨然欣往旋與匪相搏於草魚壩地方

血戰竟日卒驅匪出境爲人善交際重然諾營商不二十年資產甲於一里常倡修江背洞大路捐資三百金成之雖以禹筮起家而交游多儒雅士毫無賈賢氣

虞徵庸先生事畧

虞徵庸字賡颺果敢廉直不畏強禦以辦團有成績由附貢保舉訓導咸豐丙辰會匪橫行擇弱而噬是年七月會黨千餘衆圍攻源頭鍾杰鍾英家垂危時賡颺與杰英爲患難交聞之率族衆往援匪燄稍却勢不得逞旋奉縣令合團將匪黨殲滅杰兄弟及地方良善由是始得以安枕越二年己未三月陳金剛股匪入境焚石龍附近鄉村盡歸一炬獨虞村以主持自守獲免匪銜之是年九月舉衆復至圍攻兩月餘幸事前仍決計堅守卒得保全光緒庚子秋羅定人有羅冠周者竄到石龍勾結宵小拜會地方騷然賡颺知之又聯合團體以除匪安良爲己任匪徒始斂迹潛去綜其前後繫地方及其村族安危者垂五十年其平日爲人排難解紛及栽培後進尤美不勝記

虞謨先生事畧

虞謨農家子也廉介有古風乃兄虞請家頗饒夫婦病故遺子績熙紹熙年僅數齡家產無人綜理謨代爲經紀教養婚娶皆隻身肩任嗣績熙讀書成名紹熙亦能自立乃邀集親屬將歷年經管數目清算交回而績熙兄弟以事出倉猝相顧皇遽牽衣泣留則矍然曰爾兄弟今已長大能自立若再延是爲竊據矣何以示人不聽績熙兄弟念其多年勞瘁增置田產較前加倍欲餽之以田亦不受

虞建業先生事畧

虞建業字愷元急公益好慈善石龍墟外有濠深逾丈寬數丈每屆春夏濁水河溢上行者到此皆相歎汪洋卻步其族紳步陶擬建橋苦無資謀及愷元遂慨然捐銀一百五十元爲之倡其族中殷富聞之亦相繼捐助不數月橋成至今往來稱便焉民國十四年地方歉收米騰貴又儲米數千給其族中貧而無告者其所親婚喪無力者亦不時贈贖至周濟貧乏尤不吝

盧秀菲先生事畧

盧秀菲字采山剛直篤友於崇文好學咸豐初遭匪亂室家離散產業蕩然亂平歸里拮据謀生聚勸弟秀蘭力田維持家計已則向讀進展未幾游庠食餼旋以廩貢報捐歷署南甯府及西隆州教職在官十餘年廉潔奉公絕無阿好當未仕時有某令縱容胥吏浮收錢糧民間苦之菲廉得其情聯同邑紳黃秉亨赴桂直陳省憲其弊由是滌除地方賴之子三長得標次奪標俱邑庠季錦標廣西甲種農業學校畢業得標強幹而明有應世才處事無偏黨不瞻徇亦善承父志鄉隣恒稱道不置

鍾濂先生事畧

鍾濂字雨峯高潔穎悟能應變咸豐己未陳金剛率匪衆圍虞村逾兩月不得逞欲去又恐被躡故爲來函索款繳械議和維時各村民避居虞村者受困日久牛絕草米珠薪桂咸思歸見函以爲和平立見欣慰異常而不知乃金人給宋之術危機較被困尤甚也先是濂及從兄杰與虞徵庸爲患難交匪至同避居村內杰隨徵庸任

籌欸養練指揮防守濂則任文牘至是主稿箋答謂其焚村洗劫似非仁者所爲至耗去之欸須賠則被困者所遭損失又問誰取償再則槍械爲衛身之器詎得輕易予人置生死於不顧似此種種何異復驅凋敝殘餘再以干戈相見和平之謂何幸垂察焉陳金剛得書謂此中有人遂復函請派代表面議不再進攻嗣由徵庸推鍾杰爲全權代表前去交涉卒得陳認許不須錢米不住村坊復市罷兵并將被擄人釋回昔人謂一紙書賢於十萬師濂書差近之

盧秀蘭先生事畧

盧秀蘭蕉冲洞心人爲人精明識大體孝友耿介出自性成少時遭亂流離轉徙無寧日咸豐丙辰秋客匪千餘衆突如其來繞村三匝恣意殘殺時內失守備外無救援廬舍被焚母及伯兄芳死於難蘭挺身赴門亦重傷垂危亂後四壁蕭然家貧如洗躬耕事父善意承歡旋勸兄秀菲向讀進取始復舊業居恒廉潔自持非有不取時隣族有華昌者年老無子薄田數畝恐身後無主夙重其爲人欲餽之田託以後

事力卻之且爲之計令囑其親族將所居屋歿後改家祠遺田即作祀產皆從之今華昌裡祀不斬卒賴其一言爲之助晚年課墾牛岩荒地栽松杉桐茶蒼翠青葱蔚然成林鄉人倣而行之者日益衆子清標煜標俱邑庠鈔標優廩生

鍾漢先生事畧

鍾漢字維天庠生含光之孫性孝友事生母庶母曲盡孝敬待諸弟尤友愛逾恒分爨後在石龍營商無市僧氣石龍市上舊無閘各舖戶夜常被盜至是議建四閘自衛素知漢廉幹群推爲董理時商民交易通用制錢迨建築工竣統計收支數短錢二千七百餘不符僉以爲非輸捐者所爲即支出錯誤勸無償不可謂無以示人卒如數填足其平生潔己奉公大率類是今鄉評猶交口稱之

董成林先生事畧

董成林字茂圃歲貢生性剛直嫉惡如仇設館十餘年門下士甚衆館罷辦理迴龍團務會光緒庚子秋羅定州人羅冠周竄人勾結宵小拜會地方騷然林默察原因

由於距離縣治過遠官兵捕治不易故小醜得以跳梁因稟請當道在迴龍團內別組織一從正團專辦捕匪事宜並呈准予以懲匪特權便宜從事旋派練捕獲首要尸諸大窟嶺匪蹟始由是稍斂越四年甲辰秋夜復有漏匪董春滿借報復爲名率黨百餘圍其家幸早有戒備而其族紳含香邦彥等亦率衆救援匪始踉蹌焚茅屋數間去嗣春滿及其黨次第破獲地方自是安靖民初匪風復熾南區幾無一片乾淨土尤以石龍鳳翔兩團爲甚含香邦彥等復結合同志屹然保全迴龍團一隅隣團善類亦託庇不少說者以爲林之餘蔭擬之蕭規曹守似非過言

鍾奇璋先生事畧

鍾奇璋字達卿邑武生剛直好施予民初土匪蠶起地方騷然慨然請兵防衛良民得以安枕民三米歉價騰貴倡捐平糶使饑易得食貧者尤德之歷任鳳翔團局長及南區自治局局董輿論翕然

鍾清漣先生事畧

鍾清漣字碧山剛毅果決歷辦鳳翔團務所有措施人皆欣服凡因轆轤投局得其一言勸解無不兩相退讓在局十餘年團族推爲長者無異言

董佩霖先生事畧

董佩霖字春田附貢生慷慨正直善排解咸豐四年匪亂挺身督練保衛地方時朱洪英破富城殺戮甚慘率練赴援有功大令嘉其能賞戴五品藍翎

董紹綱先生事畧

董紹綱字緯卿邑庠生家少有樂善好施歷年管理壘田渡渡田歉收租不足無以贍舟子常捐穀接濟之數十年如一日生平以禮自持與人無忤色無驕氣精究岐黃術每臨症必審慎周詳全活者衆一介不取諸人鄉里咸敬之

黃秉亨先生事畧

黃秉亨黃屋寨人清歲貢生兄弟二人分爨時析產惟兄是聽毫不較量尤愛護桑梓時胥吏征收田賦多欺民浮收自是每值太平市設局開征秉亨輒自備旅費往

太平察有浮收者即與之較算而未嘗一介取諸人鄉里稱道至今不衰

楊富先生事畧

楊富大田寨人慷慨務公益嘗置田十餘畝獨出資築一淹水新壩工金毫不取於人農田資其灌溉者不下數百畝里人今猶嘖嘖稱之

廖永亮先生事畧

廖永亮清廩生嗜學尤工吟咏有訓子聯云士之子爲士農之子爲農今何賢不肖之相去也中也養不中才也養不才誰非愛與勞之各盡哉詞意曠達其平生胸襟洒落概可想見

陳鴻猷先生事畧

陳鴻猷清廩生英家人品行端方尤敦倫紀其妻貌不揚爲家人不喜鴻猷多方調護卒回家人意秋闈屢薦不中人咸惜之子宗舜廩生次耀舜祖舜俱邑庠

丘麟書先生事畧

丘麟書英家人孝友能詩其父平昔嗜酒老年毒發成疾旦夕侍湯藥數年如一日
兄浚錦好揮霍糜去未分割之資財數千元無怨言作有英家人景詩八首書於英
家渡字紙塔上今字蹟猶存

駱爲琮先生事畧

駱爲琮少孤貧壯年營商起家遇歲歉恒出穀平糶周濟貧乏尤樂爲公益常捐鉅
資築英家觀音閣石路建燕塘四季橋又重修十二車大橋並捐置舖田作廟產今
撥歸辦學經費其急公好義有如此者子四長本元次本彬俱邑庠四本深廣東強
亞師範畢業

藍色彰先生事畧

藍色彰長塘村人清邑庠勤學好善年十五值洪揚之變携家人避難他鄉亂平歸
家勤耕苦讀遊於庠屢應鄉試不售及年五十餘猶殷勤課讀常以孝弟之義勸人
多有爲之感悟泣下者著有孝經句解惜未竟而終今遺稿猶存

韋永惠先生事畧

韋永惠楓木村人性正直家貧不慕榮利嘗爲鄉里排難解紛片言可決值洪楊事起盜賊如毛閭里騷然乃奮起率衆擒渠亂平保授六品功職晚年鬚眉皆白猶矍鑠康健壽臻耄耄

韋純昌先生事畧

韋純昌永惠子由楓木徙居橋埔少貧失學有膂力慷慨好義壯年營蘭蕙業常往來江漢間與中原豪俠遊以故精通拳藝尤擅長技擊能以數空鑿橫陳案上中燃燈火以數丈長繩繫錘擊之一一從鑿口出入火悉滅而鑿不稍動里中壯者暇輒與較拳擊欲以窺其奧妙一舉手而較者仆無有能得其術者晚年重視文學曾慨捐百金命其孫乃民倡建清塘小學校舍勸勉學童努力青年多利賴之

王錫綸先生事畧

王錫綸字敬宸英家人拔貢生瀚之父也自幼勵志求學年十五值父故父本業商

因繼而經營之然念念于學不置乃求師夜課自是日商夜讀凡數載後以應童子試屢登草案不售報捐湖南補用巡檢性慈和善交游慷慨尚義儀表端雅遐邇搢紳恒輿馬造廬相訪光緒七年歲大荒於英家施粥數日以餉饑者有負債難償者置不問貧苦無告者每憐而周濟之歿年三十八聞者咸惋惜焉

陳錦元先生事畧

陳錦元英家人性正直樂善好施曾經商多年不染市儈氣有困苦者輒以錢米濟之遇人糾紛雖身不任團務亦必爲之排解鄉里欽其爲人故事無大小得其調處無不寢息嗣以商務虧折歇業家居猶時典衣以濟貧乏卒年八十四歲子芝章芝德皆以商起家人咸謂爲好施之報云

陳鳳廷先生事畧

陳鳳廷英家人性孝友勤儉與弟營商數十年頗獲贏利時鳳僅一子而弟獨多男及分爨析家產爲五鳳取其二而弟得其三人問其故則曰吾所以不均分者以予

弟食指繁吾僅一子也人咸稱其能讓云

羅國潞先生事畧

羅國潞溪波村人曾施獅子嶺之屬其所有者爲僑商義地勒有碑石在英家粵東會館年七十七歲卒

何鐸隆先生事畧

何鐸隆明田村人光緒二十七年賊匪嘯聚荷塘謀亂行旅裹足時鐸隆任團務挺身赴昭將狀面陳邑令何慶甫旋經大吏檄調粵軍安勇省軍防營協勦擒斬匪魁吳金龍鍾大牛等亂平獎給五品軍功

丘家旺先生事畧

丘家旺英家人性純孝清咸豐間由潮州奉母避亂初至桂林投向榮軍門部下擢賞五品軍功未幾退伍奉母至英立業年九十九歲卒

葉占春先生事畧

葉占春字梅林爲人機警有膽畧咸豐間擒匪破高明城挺身督練克復以功保授昭武都尉歷任德慶悅城封川等汛務卸職後挈眷至螺山街遂家焉課子耕讀旁及商業街隣有爭執輒爲排解人皆欽服

廖祖昌先生事畧

廖祖昌玉坡人值咸豐世變父被賊拉去親至賊巢以身替父被戕於榕津時年二十四詹學院表以孝烈可風

廖懷義先生事畧

廖懷義幼僕於廖居士家值赤馬龍陽賊亂主僕奔逃賊窮追勢迫義謂居士曰賊苦追爲汝也非易衣不可遂易衣而逸賊執義認爲居士卒因重傷斃命聞者哀之

黃英漢先生事畧

黃英漢黃嶺村人爲人沉毅慷慨有氣節清咸豐庚申夏被匪魁馬坤率衆陷村屠殺一百八十四命時英漢以智脫險避難在外者十年亂平與族弟天文赴桂鳴冤

維時局粗定當軸者注重安輯撫綏不予深究漢復典鬻產業擬進京叩闥出發甫抵武昌又因道途梗阻折回遂使奇冤莫伸後得恢復舊業每遇忌日輒痛哭流涕滴水不下咽終日如一日

陳世森先生事畧

陳世森榜冠村人清例貢爲人慈善樂施熱心公益凡興學築路建橋諸善舉莫不樂於提創子纘徽廩膳生

梁陞先生事畧

梁陞麥嶺人少貧弟梁堂染烟癖不事生產陞一身任耕作後家巨富兄弟仍未分居陞無子繼一螟蛉堂有四子皆成立及分產時堂欲二股均分陞不可曰姪猶子也以五股分之其愛弟之心可謂篤於恩義矣

何國燧先生事畧

何國燧東區石梯人誠慤好善咸豐時匪亂携資避居羊頭同行數人無資斧日用

皆仰憐供給尋至囊虛用罄備苦工度日終不取償於人嗣後家居有族人國融者年已四十餘家貧不能娶復毅然傾囊相助尤爲鄉里推重然

岑啓位先生事畧

岑啓位新杏村人遭咸豐世變**獍**匪舉衆來撲村村人拒守三晝夜勢危迫位隻身出見匪曰寧殺我毋傷我族類若解圍吾家尙有錢百二十貫請以此送若何如匪領之解圍去厥後此錢不向村人索還如位者可謂毀家紓難者矣

岑啓彩先生事畧

岑啓彩新杏村人自幼與兄華榮習舉子業兄游於庠彩積學未售咸豐元年教讀於松木寨兩村距離不遠中有溪水間隔春潦漲時人多病涉時彩家僱有石匠乃盡舉一年所得修金興工建築橋旣成往來稱便後因淘洗錫砂泥塗壅滿至今橋已崩頽石料湮沒竟致前功盡廢殊爲可惜

鍾含光先生事畧

鍾含光南區源頭村人常捐囊修自石龍過羊頭之統嶺大路及源頭村前石街數里又架統嶺脚石橋二處並在距石龍里許低窪處架石橋七度名爲七步橋又架山口大路石橋三處其平生熱心公益概可想見

鍾章琳先生事畧

鍾章琳鍾城人偕其兄子積亮捐資修築城南自平政橋至馬騮橋一路石街數里行旅往來自是稱便

周樹栗先生事畧

周樹栗鍾城人道光時曾在城西十餘里之茶亭廠及城南十餘里之腊木脚兩處各建涼亭一所以便行人憩息並錄有勸善文刻石砌於亭壁往來過客恒流連瀏覽不置則其與人好善之心亦足以風世者

董錦江先生事畧

董榮字錦江羊頭木元村人爲人忠厚好施遇有無力婚喪常解囊相助歲若歉收

尤出資賑濟嘗聯合李生含英創建學舍於羊頭名曰榮英書舍延地方名宿教授青年今區立高小校舍即其舊址也子三長佩霖附貢次佩松邑庠三佩楠廩貢

鍾良孔先生事畧

鍾良孔南區鳳翔團人咸豐末年歲大荒地方多饑民蹙然與東林村友人合借銀一千元辦米賑濟全活者衆事後友人違約良孔變產清償卒無怨言

陶元輔先生事畧

陶元輔山仔脚人邑庠生民國元年匪首董焜蘭率衆劫村村人竭力抵禦被匪傷斃多命元輔母亦遇害哀憤擊賊遂以身殉

盧作舟先生事畧

盧作舟字濟川鯉魚寨人少有文名以府試冠軍列庠食餼尋膺歲薦民國二年被選爲鎮區自治會副議長利興弊除頗爲地方所倚重後因事到鳳尾遇匪被難

董其芬先生事畧

董其芬字清如幼聰穎弱冠游庠以歲試優等補增因赴鄉試不售自知數奇設帳授徒鄉中優秀之士多出門下性梗直地方甚倚重之昭平何令按臨石龍因屬員矇蔽將其芬扣留地方大動公憤爲之罷市何令覺悟乃將屬員鞭責省釋其芬其事始寢